

白居易詩集校注

第五冊

中國古典文學基本叢書

白居易詩集校注

第五冊

〔唐〕白居易 著
謝思煒 校注

中華書局

白居易詩集校注卷第二十六^①

律詩

五言 七言 凡一百首

大和戊申歲大有年詔賜百寮出城觀稼謹書盛事以俟采詩

清晨承詔命，豐歲閱田間。膏雨抽苗足，涼風吐穗出。早禾黃錯落，晚稻綠扶疏。好人詩家詠，宜令史館書。散爲萬姓食，堆作九年儲。莫道如雲稼，今秋雲不如。（1813）

【校】

①〔卷第二十六〕那波本爲卷五十六。

【注】

陳《譜》、汪《譜》、朱《箋》：作於大和二年（八二八），長安。

〔大有年〕《春秋》宣公十六年：「冬，大有年。」

〔膏雨抽苗足，涼風吐穗出〕《左傳》襄公十九年：「小國之仰大國也，如百穀之仰膏雨焉。」

〔散爲萬姓食，堆作九年儲〕《禮記·王制》：「國無九年之儲，曰不足。」

〔莫道如雲稼，今秋雲不如〕李康《運命論》：「褰裳而涉汶陽之丘，則天下之稼如雲矣。」

贈悼懷太子挽歌辭二首

奉詔撰進。

竹馬書薨歲，銅龍表葬時。永言窀穸事，全用少陽儀。壽夭由天命，哀榮出聖慈。恭聞

褒贈詔，軫念在與夷^①。（1814）

【校】

①〔與夷〕那波本作「華夷」，誤。

【注】

汪《譜》、朱《箋》：作於大和二年（八二八），長安。

〔悼懷太子〕《舊唐書·敬宗五子傳》：「悼懷太子普，敬宗長子也。母曰郭妃。寶曆元年，封晉王。大和二年薨，年五歲。上撫念之甚厚，冊贈悼懷太子。」

〔竹馬書薨歲，銅龍表葬時〕竹馬，見卷十《觀兒戲》（四六〇）注。《漢書·成帝紀》：「上嘗急召太子出龍樓門。」顏

師古注：「張晏曰：門樓上有銅龍，若白鶴飛廉之爲名也。」李嶠《懿德太子哀冊文》：「懟銀榜之留月，泣銅樓之送煙。」

〔永言窀穸事，全用少陽儀〕《左傳》襄公十三年：「唯是春秋窀穸之事。」杜預注：「窀，厚也。穸，夜也。厚夜，猶長夜。」《宋書·五行志一》：「世子居東宮，位少陽也。」王筠《昭明太子哀策文》：「式載明兩，實惟少陽。」〔恭聞褒贈詔，軫念在與夷〕徐陵《檄周文》：「況復追惟在楚，無忘玉帛之言；軫念過曹，猶感盤飧之惠。」《左傳》隱公三年：「宋穆公疾，召大司馬孔父而屬殤公焉，曰：『先君舍與夷而立寡人，寡人弗敢忘。』」杜預注：「先君，穆公兄宣公也。與夷，宣公子，即所屬殤公。」按，敬宗爲文宗之兄，文宗之與太子普，猶宋穆公之與與夷。不逮事，哭送出都門。（1815）

【注】

〔剪葉藩封早，承華冊命尊〕剪葉，見卷二《答桐花》（0102）注。陸機《皇太子宴玄圃宣猷堂有令賦詩一首》：「弛厥負擔，振纓承華。」《文選》李善注：「《洛陽記》曰：太子宮在大宮東，中有承華門。」沈約《立太子詔》：「承華肇開崇基，克永無疆之慶。」

〔笙歌辭洛苑，風雪蔽梁園〕梁園，見卷二五《早春同劉郎中寄宣武令狐相公》（1756）注。

〔鹵簿凌霜宿，銘旌向月翻〕《後漢書·后妃紀》：「中謁者、僕射典護喪事，侍御史護大駕鹵簿。」李賢注引《漢官儀》：「天子車駕次第謂之鹵簿，有大駕、法駕、小駕。」

雨中招張司業宿

過夏衣香潤，迎秋簟色鮮。斜支花石枕，卧詠藥珠篇。泥濘非遊日，陰沉好睡天。能來同宿否，聽雨對床眠？（1816）

【注】

汪《譜》、朱《箋》：「作於大和二年（八二八），長安。」

〔張司業〕朱《箋》：「張籍。」見卷一《讀張籍古樂府》（0002）注。張籍《贈主客劉郎中》：「憶昔君登南省日，老夫猶是褐衣身。誰知二十餘年後，來作客曹相替人。」劉禹錫為主客郎中充集賢學士在大和二年春，為張籍之後任，則張籍自主客郎中遷國子司業亦在大和二年。

〔斜支花石枕，卧詠藥珠篇〕藥珠篇，見卷二二《和送劉道士遊天台》（1455）注。

和集賢劉學士早朝作

吟君昨日早朝詩，金御爐前喚仗時。煙吐白龍頭宛轉，扇開青雉尾參差。暫留春殿多稱屈^①，合入綸闈即可知。從此摩霄去非晚，鬢間未有一莖絲^②。（1817）

【校】

①「春殿」「春」汪本校：「一作書。」

②「鬢間」「文苑英華」作「鬢邊」，校：「集作間。」

【注】

朱《箋》：作於大和二年（八二八），長安。

〔集賢劉學士〕朱《箋》：「劉禹錫。」見卷二二《酬集賢劉郎中對月見寄兼懷元浙東》（485）注。朱《箋》：「觀居易此詩，可見當時物望固以禹錫宜掌綸誥，一二年間即可正拜中書舍人，繼入政地，而以集賢散秩爲可惜也。」

〔煙吐白龍頭宛轉，扇開青雉尾參差〕《新唐書·儀衛志上》：「朝日，殿上設黼宸、躡席、熏爐、香案。御史大夫領屬官至殿西廡，從官朱衣傳呼，促百官就班，文武列於兩觀。……侍中奏『外辦』，皇帝步出西序門，索扇，扇合。

皇帝升御座，扇開。左右留扇各三。」《古今注》卷上：「雉尾扇起於殷世，高宗時有雉雉之祥，章服多用翟羽。周制以爲王后夫人之車服，輿車有翟，即緝雉羽爲扇。」《玉海》卷八十唐鹵簿：「儀物有曲直華蓋、六寶香蹬、大

織雉尾障扇、雉尾扇、方雉尾扇、花蓋小雉尾扇。」

〔暫留春殿多稱屈，合人綸闈即可知〕春殿，泛指宮殿。杜甫《宣政殿退朝晚出左掖》：「天門日射黃金榜，春殿晴暉赤羽旗。」賈島《送安南惟鑒法師》：「講經春殿裏，花繞御床飛。」綸闈，指中書省。見卷十一《曲江感秋二首》（0569）注。

送陝州王司馬建赴任①

建，善詩者。

陝州司馬去何如，養靜資貧兩有餘②。公事閑忙同少尹，料錢多少敵尚書。祇攜美酒爲

行伴，唯作新詩趁下車^③。自有鐵牛無詠者^④，料君投刃必應虛。（1818）

【校】

①〔題〕《文苑英華》無「建」字。「陝州」馬本作「陝西」，誤。

②〔養靜〕《文苑英華》作「養病」。

③〔唯作〕《文苑英華》作「獨作」。

④〔自有〕《文苑英華》作「自得」。

【注】

朱《箋》：作於大和二年（八二八），長安。

〔王建〕《新唐書·藝文志四》：「《王建集》，大和陝州司馬。」《唐才子傳》卷四有王建傳，然多誤。王建生平之詳細考證，參傅璇琮等《唐才子傳校箋》。張籍有《贈別王侍御赴任陝州司馬》，劉禹錫有《送王司馬之陝州》。

〔公事閑忙同少尹，料錢多少敵尚書〕《舊唐書·職官志三》：「京兆、河南、太原等府，三府牧各一員，尹各一員，少尹各二員」；「大都督府，都督一人，長史一人，司馬二人。」少尹與大都督府司馬均為從四品下。陝州為大都督府。《新唐書·食貨志五》：「唐世百官俸錢，會昌後不復增減……郎中，司天監，太子左右諭德，家令寺、

僕寺、率更寺令，親王傅，別敕判官，觀察、團練判官掌書記，上州長史、司馬，五萬。」此詩所謂「敵尚書」，蓋指尚書省郎中。

〔自有鐵牛無詠者，料君投刃必應虛〕鐵牛，見卷二五《送陝府王大夫》（1775）注。

對琴待月

竹院新晴夜，松窗未卧時^①。共琴爲老伴，與月有秋期。玉軫臨風久，金波出霧遲。幽音待清景，唯是我心知^②。(1819)

【校】

①〔未卧〕《唐音統籤》作「小卧」。

②〔我心〕「我」《文苑英華》作「好」，校：「集作我。」

【注】

朱《箋》：作於大和二年（八二八），長安。

楊家南亭

小亭門向月斜開，滿地涼風滿地苔。此院好彈秋思處，終須一夜抱琴來。(1820)

【注】

朱《箋》：作於大和二年（八二八），長安。

〔楊家南亭〕楊虞卿宅南亭。參見卷十三《宿楊家》（0637）注。《續談助》卷三引劉軻《牛羊日曆》：「僧孺新昌里第，與虞卿夾街對門。虞卿別起高榭於僧孺之牆東，謂之南亭。列燭往來，里人謂之半夜客，亦號此亭爲『行中書』。」《南部新書》已：「大和中，人指楊虞卿宅南亭爲『行中書』，蓋朋黨聚議於此爾。」

〔此院好彈秋思處，終須一夜抱琴來〕《樂府詩集》卷六十琴曲歌辭《蔡氏五弄》：「《琴集》曰：五弄：《遊春》、《淥水》、《幽居》、《坐愁》、《秋思》，並宮調，蔡邕所作也。」

早寒

黃葉聚牆角，青苔圍柱根。被經霜後薄，鏡遇雨來昏^①。半卷寒簷幕，斜開煖閣門。迎冬兼送老，只仰酒盈樽。（1821）

【校】

①〔雨來〕《唐音統籤》作「雨中」。

【注】

朱《箋》：作於大和二年（八二八），長安。

齋月靜居

病來心靜一無思，老去身閑百不爲。忽忽眼塵猶愛睡，些些口業尚誇詩。葷腥每斷齋居

月，香火常親宴坐時。萬慮消停百神泰，唯應寂寞殺三尸^①。(1822)

【校】

①〔殺三尸〕殘宋本作「煞三尸」。

【注】

朱《箋》：作於大和二年（八二八），長安。

〔忽忽眼塵猶愛睡，些些口業尚誇詩〕眼塵，見卷十八《感春》（1150）注。口業，身口意三業之一。佛教以妄語、離間語、惡語、綺語等爲口惡業。《中阿含經》卷三二：「世尊又復答曰：『苦行，我施設三業，令不行惡業，不作惡業。云何爲三？身業、口業及意業也。』」

〔葷腥每斷齋居月，香火常親宴坐時〕宴坐，靜坐。《維摩經·弟子品》：「舍利弗白佛言：『世尊，我不堪任詣彼問疾。所以者何？憶念我昔曾於林中宴坐樹下時，維摩詰來謂我言：『唯，舍利弗，不必是坐爲宴坐也。夫宴坐者，不於三界現身意，是爲宴坐；不起滅定而現諸威儀，是爲宴坐；……不斷煩惱而入涅槃，是爲宴坐。』」〔萬慮消停百神泰，唯應寂寞殺三尸〕三尸，見卷十九《不睡》（1300）注。

宿裴相公興化池亭

兼蒙借船舫遊汎。

林亭一出宿風塵，忘却平津是要津。松閣晴看山色近，石渠秋放水聲新。孫弘閣闢無閑

客，傳說舟忙不借人。何似掄才濟川外，別開池館待交親。(1823)

【注】

汪《譜》、朱《箋》：作於大和二年（八二八），長安。

〔裴相公興化池亭〕裴相公，裴度。參見卷二五《酬裴相公題興化小池見招長句》（1739）。

〔松閣晴看山色近，石渠秋放水聲新〕《明一統志》卷二九河南府：「石渠，在府城舊銅駝坊西，入宋潞公文彥博宅。」

〔孫弘閣闢無閑客，傳說舟忙不借人〕《漢書·公孫弘傳》：「弘自見爲舉首，起徒步，數年至宰相封侯。於是起客館，開東閣，以延賢人，與參謀議。」《書·說命》：「高宗夢得說，使百工求諸野，得諸傅巖，……爰立作相，王置其左右，命之曰：……若濟巨川，用汝作舟楫。」

〔何似掄才濟川外，別開池館待交親〕《周禮·地官·山虞》：「凡邦工入山林而掄材，不禁。」鄭玄注：「掄猶擇也。」權德輿《奉和許閣老酬淮南崔十七端公見寄》：「掄才超粉署，駁議在黃樞。」

和劉郎中望終南山秋雪^①

遍覽古今集，都無秋雪詩。陽春先唱後，陰嶺未消時。草訝霜凝重，松疑鶴散遲。清光莫獨占^②，亦對白雲司^③。(1824)

【校】

①〔題〕《文苑英華》作「和劉夢得終南秋雪」。

②〔清光〕《文苑英華》作「清輝」。

③〔亦對〕「亦」《文苑英華》作「還」，校：「集作亦。」

【注】

朱《箋》：作於大和二年（八二八），長安。

〔劉郎中〕朱《箋》：「劉禹錫。」劉有《終南積雪》，爲原唱。

〔清光莫獨佔，亦對白雲司〕朱《箋》：「指居易任刑部侍郎。」吳曾《能改齋漫錄》卷七白雲司賦：「按《左氏傳》：郊子曰：黃帝以雲紀，故爲雲師而雲名職。杜注云：黃帝受命有雲瑞，故以雲紀事。春官爲青雲，夏官爲縉雲，秋官爲白雲，冬官爲黑雲，中官爲黃雲。故《類要》刑部曰：白雲司職，人命是懸。而白樂天詩亦云：『清光莫獨佔，亦對白雲司。』乃秋雲（雪）詩也。劉禹錫《送鶴詩》：『昨日看成送鶴詩，高籠攜出白雲司。』李嘉祐詩：『漏長丹鳳闕，秋冷白雲司。』」

廣府胡尚書頻寄詩因答絕句

尚書清白臨南海，雖飲貪泉心不回。唯向詩中得珠玉，時時寄到帝鄉來。（1825）

【注】

朱《箋》：作於大和二年（828），長安。

〔廣府胡尚書〕朱《箋》：「嶺南節度使胡證。」證亦作証。《舊唐書·胡証傳》：「胡証字啓中，河東人。……敬宗即位之初，檢校戶部尚書，守京兆尹。數月，遷左散騎常侍。寶曆初，拜戶部尚書、判度支，上表乞免，願效藩服。二年，檢校兵部尚書、廣州刺史，充嶺南節度使。大和二年，以疾上表求還京師。是歲十月卒于嶺南。」〔尚書清白臨南海，雖飲貪泉心不回〕貪泉，見卷十七《送客春遊嶺南二十韻》（1010）注。

送鶴與裴相臨別贈詩^①

司空愛爾爾須知，不信聽吟送鶴詩。羽翮勢高寧惜別，稻梁恩厚莫愁飢^②。夜棲少共雞爭樹^③，曉浴先饒鳳占池^④。穩上青雲勿迴顧^⑤，的應勝在白家時。（1826）

【校】

①〔題〕「送」《文苑英華》校：「一作乞。」汪本作「乞鶴」。

②〔恩厚〕《文苑英華》、汪本作「恩重」。

③〔少共〕《文苑英華》作「莫共」。

④〔曉浴〕「曉」《文苑英華》校：「一作日。」

⑤〔青雲〕「雲」《文苑英華》校：「一作冥。」

【注】

朱《箋》：作於大和二年（八二八），長安。

〔裴相〕朱《箋》：「裴度。」見卷十九《和張十八秘書謝裴相公寄馬》（1203）注。

令狐相公拜尚書後有喜從鎮歸朝之作劉郎中先和因以繼之^①

車騎從新梁苑迴^②，履聲珮響入中臺。鳳池望在終重去，龍節功成且納來。金勒最宜乘雪出，玉觴何必待花開。尚書首唱郎中和，不計官資只計才。（1827）

【校】

①〔題〕「從」汪本校：「一作罷。」

②〔從新〕《唐音統籤》作「新從」。

【注】

朱《箋》：作於大和二年（八二八），長安。

〔令狐相公〕朱《箋》：「令狐楚。」見卷二四《奉和汴州令狐相公二十二韻》（1615）注。《舊唐書·文宗紀》：

「（大和二年十月）癸酉，以尚書右僕射、同平章事竇易直檢校左僕射、同平章事、充山南東道節度使、臨漢監牧等

使代李逢吉，以逢吉爲宣武軍節度使代令狐楚，以楚爲戶部尚書。」

〔劉郎中〕劉禹錫。劉有《和令狐楚相公初歸京國賦詩言懷》。

〔車騎從新梁苑迴，履聲珮響入中臺〕中臺，尚書省。見卷二五《喜錢左丞再除華州以詩伸賀》（1773）注。《漢書·

鄭崇傳》：「哀帝擢爲尚書僕射，數求見諫爭，上初納用之。每見，曳革履，上笑曰：『我識鄭尚書履聲。』」

〔鳳池望在終重去，龍節功成且納來〕鳳池，見卷八《宿藍橋對月》（636）注。龍節，符節。《周禮·地官·掌節》：

「凡邦國之使節，山國用虎節，土國用人節，澤國用龍節，皆金也。」盧思道《贈司馬幼之南聘》：「拂霧揚龍節，乘風遡鳥旌。」

送河南尹馮學士赴任

石渠金谷中間路，軒騎翩翩十日程。清洛飲冰添苦節，碧嵩看雪助高情。謾誇河北操旌鉞，莫羨江西擁旆旌^①。時新除二鎮節度。何似府寮京令外，別教三十六峰迎。（1828）

【校】

①〔江西〕〔西〕《全唐詩》校：「一作南。」

【注】

朱《箋》：作於大和二年（八二八），長安。

〔河南尹馮學士〕朱《箋》：「馮宿。」見卷十九《馮閻老處見與嚴郎中酬和詩因戲贈絕句》（1324）注。《舊唐書·馮宿傳》：「敬宗即位，宿常導引乘輿，出爲華州刺史。……大和二年，拜河南尹。」

〔石渠金谷中間路，軒騎翩翩十日程〕石渠，見本卷《宿裴相公興化池亭》（1823）注。金谷，見卷十三《和友人洛中春感》（0620）注。

〔清洛飲冰添苦節，碧嵩看雪助高情〕飲冰，見卷八《三年爲刺史二首》之二（0371）注。

〔謾誇河北操旄鉞，莫羨江西擁旌旌〕《舊唐書·文宗紀》：「（大和二年冬十月癸酉）以右丞沈傳師爲江西觀察使」；「（十一月）乙酉，以右金吾李祐爲橫海軍節度使。」

〔何似府寮京令外，別教三十六峰迎〕三十六峰，指少室山。《河南通志》卷七：「少室山，在登封縣西一十七里。……周圍方百里，上有三十六峰。」高適《別楊山人》：「不到嵩陽動十年，舊時心事已徒然。一二故人不復見，三十六峰猶眼前。」

讀鄂公傳

高卧深居不見人，功名斗數似灰塵。唯留一部清商樂，月下風前伴老身。（1829）

【注】

朱《箋》：「作於大和二年（八二八），長安。」

〔鄂公〕尉遲敬德。《舊唐書·尉遲敬德傳》：「（貞觀）十一年，封建功臣，爲代襲刺史，冊拜敬德宣州刺史，改封